

# Jadikan USIM rujukan masyarakat global

Oleh NAZARUDIN SHAHARI

pengarang@utusan.com.my

■ SEREMBAN 15 NOV.

UNIVERSITI Sains Islam Malaysia (USIM) menetapkan hala tuju untuk menjadi universiti rujukan, dihormati dan relevan kepada masyarakat global menjelang tahun 2025.

Canselor USIM, Tuanku Aishah Rohani Tengku Besar Mahmud bertitah, USIM dilihat semakin pantas mengorak langkah dalam usaha menjadi sebuah universiti terkemuka dunia yang mengintegrasikan ilmu naqli dan aqli.

Baginda yang juga Tunku Ampuan Besar Negeri Sembilan bertitah, universiti itu kini berada dalam fasa menajjar dan mengukuhkan pelan strategik USIM untuk bergerak menjadi universiti pemimpin di peringkat serantau.

"Dengan ini, beta berdoa semoga Allah mempermudah dan memberkati usaha kita semua.

"Pepatah Melayu ada mengatakan, benih yang baik kalau dicampak ke laut menjadi pulau, dicampak ke darat menjadi gunung. Itulah peranan sebuah menara ilmu dalam melahirkan generasi yang seimbang dan mampu menyumbang bakti kepada kesejahteraan ummah," titah baginda.

Baginda bertitah demikian dalam majlis Konvokesyen USIM Ke-12 di Dewan Besar USIM, Nilai di sini hari ini.

Yang turut hadir dalam istiadat pembukaan itu, Pro-Canselor USIM, Tunku Besar Seri Menanti, Tunku Ali Redhaudin Tuanku Muhriz dan Naib Canselor USIM, Prof. Datuk Dr. Musa Ahmad.

Tuanku Aishah Rohani bertitah, dalam memperkasakan USIM menghadapi cabaran masa depan, baginda amat berharap semua warga menara gading itu dapat sama-sama membantu menjayakan agenda universiti dengan sebaik mungkin.

"Kerjasama padu semua pihak akan dapat membentuk ke-



TUANKU AISHAH ROHANI TENGKU BESAR MAHMUD berkenan menyampaikan Anugerah Pelajaran Diraja (Pingat Jaya Cemerlang) kepada Noor Syuhadah Sudiro pada Istiadat Pembukaan Majlis Konvokesyen Ke-12 Universiti Sains Islam Malaysia 2014 di Dewan Besar USIM, Nilai, semalam. - MINGGUAN/ASWAD YAHYA



sepakatan yang utuh demi memastikan kecemerlangan universiti dapat diteruskan terutamanya apabila keberhasilan yang baik itu dikembalikan semula kepada ummah," titah baginda.

Sementara itu, Musa berkata, sebagai universiti awam ke-12 ditubuhkan di negara ini, USIM kini semakin dikenali dan menjadi pilihan dalam kalangan pelajar.

Katanya, bagi sesi pengambilan pelajar program ijazah sarjana muda sesi 2014/2015 lalu, seramai 24,867 telah memilih USIM sebagai tempat melanjutkan pelajaran di peringkat pengajian tinggi.

"Daripada 2,455 tempat pengajian yang ditawarkan, 2,488 calon memilih USIM sebagai pilihan pertama mereka. Ini menunjukkan USIM semakin mendapat tempat di hati masyarakat sama ada di dalam negara mahupun luar negara.